

BANJSKI TURIZAM

Banja na Ilidži smještena je u sarajevskoj kotlini u podnožju planine Igman, u blizini izvorišta rijeke Bosne. Prvi tragovi korištenja sumporaste - oligomineralne vode ilidžanske banje datiraju iz perioda rimljana. Danas Zdravstvena ustanova liječilište „Banja Terme – Ilidža“ nudi usluge iz oblasti fizikalne medicine i rehabilitacije, kao i prostor za grupne i individualne vježbe.

Termalne vode **Banje Slatina** u Banja Luci koriste se od davnina, a izgradnja banjanskog objekta i korištenje vode u ljekovite medicinske svrhe počinje u doba Austro - Ugarske Monarhije, nakon naučnih istraživanja termalne vode 1888. godine. Voda Banje Slatina blagotvorno djeluje na reumatizam, posljedice trauma, izvjesne oblike steriliteta, pri terapiji hipertenzije i oboljenja krvnih sudova.

Banja Vrućica u Tesliću poznata je po korištenju ljekovite termomineralne vode iz perioda austrougarske vladavine u Bosni i Hercegovini, a danas predstavlja poznato prirodno liječilište, konferencijski, sportsko-rekreativni i turističko-manifestacioni centar. Ljekovita voda ove banje uspješno liječi bolesti srca i krvotoka, reumatizam, stomachne bolesti, dijabetes, pospješuje i ubrzava proces rehabilitacije, pomaže zdravima da održavaju i pospješuju kondiciju, neuroze i neuralgije.

Banja Reumal u Fojnici poznata je po ljekovitim termalnim izvorima još od davnina, a 1919. godine naučno je dokazano postojanje radioaktivno termalne vode. Danas je banja Reumal savremeno opremljena specijalizovana ustanova za rehabilitaciju lokomotornog aparata, kardiorehabilitaciju, dječiju habilitaciju, rekreaciju, aktivni odmor i programirane sportske aktivnosti.

Banja Vilina Vlas kod Višegrada poznata je još iz rimskog vremena po geotermalnim vodama koje imaju karakteristrike radioaktivne i karbonatne hemoterme. Vode višegradske banje koriste se za liječenje, prevenciju i rehabilitaciju svih starosnih grupa.

Banja Mlječanica u Kozarskoj Dubici poznata je već vjekovima po ljekovitoj vodi Mlječanice i nalazi se u prekrasnom prirodnom ambijentu na obroncima Kozare. Iako je osnov njene terapije poznata mineralna voda, danas se u njoj primjenjuju savremene metode liječenja i rehabilitacije.

Banja Dvorovi nalazi se u srcu Semberije kod Bijeljine i sagrađena je nakon što je bušenjem za potrebe istraživanja nafte 1957. godine, otkrivena ljekovita termomineralna voda. Ljekovita voda banje Dvorovi se koristi u vidu kupanja u kadama i bazenima (hidroterapija), u vidu pijenja, zatim u vidu inhalacije i podvodne tuš masaže. Ova banja poznata je po liječenju svih oblika reumatskih oboljenja, ginekoloških bolesti, dijabetisa i nekih vrsta kožnih bolesti.

Banja Laktaši je poznata po ljekovitom vodama još od davnina, a moderni razvoj banjanskih resursa počinje 1930 godine. Banjska voda se koristi za liječenje bolesti lokomotornog sistema, kardiovaskularnih bolesti, bolesti očiju, nervnih poremećaja, za tretman gerijatrijskih bolesti, kao i za rekreaciju i u turističke svrhe.

Centar za fizikalnu medicinu, rehabilitaciju i banjansko liječenje "**Ilidža**" u **Gradačcu** izgrađen je 1980. godine. Prirodna termalno-mineralna voda koristi se u svrhu liječenja reumatskih i neuroloških bolesti, bolesti metabolizma i povreda lokomotornog sistema.

Ljekovitost termomineralne vode **banje u Olovu** poznato je još od davnina, a danas banjansko-rekreativni centar „Aquaterm“ nudi usluge hidroterapije, elektroterapije, sonoterapije, magnetne terapije, termoterapije, masaže i kineziterapije.

Banjsko liječilište **Gata** koristi se od 80-tih godina prošlog vijeka kada su utvrđena zdravstvena svojstva vode. Liječilište pruža usluge termoterapijske, hidroterapijske i kineziterapijske procedure.